

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 21 MEI 2015, PUKUL 10.00 PAGI

Bil. 24

PERTANYAAN-PERTANYAAN BAGI JAWAB LISAN

1. PR-1332-L67996
Dato' Wira Mohd Johari bin Baharom [Kubang Pasu] minta **MENTERI PERTAHANAN** menyatakan tentang projek pembinaan rumah veteran ATM yang disasarkan oleh Kementerian dan bilakah projek ini akan mencapai matlamat Strategi Lautan Biru Nasional (SLBN) kerana ramai veteran ATM yang tidak mempunyai rumah sendiri dan ada yang masih menyewa.
2. PR-1332-L68449
Tuan Lim Kit Siang [Gelang Patah] minta **MENTERI PENDIDIKAN** menyatakan piawai perbandingan yang digunakan oleh timbalannya yang mengatakan bahawa universiti-universiti di Malaysia “tidak jauh dari menjadi institusi pendidikan bertaraf dunia seperti Oxford Universiti”• sedangkan tiada mana-mana universiti tempatan yang berjaya disenaraikan sebagai 100 buah universiti terbaik di dunia.
3. PR-1332-L67505
Tuan Khoo Soo Seang [Tebrau] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah Kementerian bercadang membuat pindaan undang-undang yang berkaitan agar memberi kuasa lebih besar kepada Menteri mengambil tindakan tegas terhadap pemaju-pemaju bagi projek-projek perumahan yang tidak dapat disiapkan dalam tempoh masa yang munasabah agar para pembeli tidak menjadi mangsa kepada pemaju-pemaju yang tidak bertanggungjawab itu.
4. PR-1332-L69273
Tuan Idris bin Haji Ahmad [Bukit Gantang] minta **MENTERI KEWANGAN** menyatakan apabila berlaku kemalangan sering menjadi masalah kepada pemilik kenderaan untuk menuntut pampasan supaya kenderaan diperbaiki. Apakah prosedur yang ditentukan untuk membolehkan pemilik kenderaan tidak menunggu begitu lama untuk membaiki kenderaan akibat karenah bengkel dan syarikat insurans.

5. PR-1332-L68605
Dato' Sri Haji Abdul Azeez bin Abdul Rahim [Baling] minta **MENTERI KOMUNIKASI DAN MULTIMEDIA** menyatakan apakah langkah-langkah yang diambil oleh pihak Kementerian bagi meningkatkan taraf kampung-kampung di kawasan luar bandar kepada Kampung Tanpa Wayar (Wi-Fi) kerana masih banyak lagi kampung-kampung di kawasan luar bandar mengharapkan kemudahan ini.
6. PR-1332-L67889
Tuan Hee Loy Sian [Petaling Jaya Selatan] minta **MENTERI KERJA RAYA** menyatakan penjarangan terkini Lebuhraya Damansara-Shah Alam (DASH) khususnya di kawasan Damansara Perdana yang memberi kesan terhadap penduduk di sekitar.
7. PR-1332-L68295
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI PERTANIAN DAN INDUSTRI ASAS TANI** menyatakan apakah bentuk pampasan mahupun bantuan kepada mangsa banjir akibat kehilangan sumber pendapatan daripada sektor pertanian. Bagaimanakah kaedah untuk menyalurkan bantuan tersebut.
8. PR-1332-L68122
Dr. Ong Kian Ming [Serdang] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan bilangan item yang telah mengalami kejatuhan harga dan peningkatan harga sejak pelaksanaan GST pada 1 April 2015.
9. PR-1332-L67541
Dato' Seri Ong Ka Chuan [Tanjong Malim] minta **MENTERI PERDAGANGAN ANTARABANGSA DAN INDUSTRI** menyatakan apakah perancangan Kementerian untuk mengadakan program pembiayaan untuk membantu usahawan kecil dan sederhana dalam perusahaan mereka.
10. PR-1332-L68519
Tuan Ahmad Marzuk bin Shaary [Bachok] minta **MENTERI SUMBER ASLI DAN ALAM SEKITAR** menyatakan penemuan kajian terkini dan manfaat pokok buluh yang berada di kawasan sungai. Sejauh manakah pokok-pokok buluh di sepanjang sungai dipelihara bagi mengatasi masalah hakisan tebing dan kawalan banjir.
11. PR-1332-L68193
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI SUMBER MANUSIA** menyatakan adakah negara kita masih lagi memerlukan khidmat pekerja asing sebagai pekerja kasar dan berapakah jumlah keperluan pekerja asing pada masa kini hingga menjelang 2020 serta adakah pihak Kerajaan bercadang untuk menaikkan lagi tangga gaji atau memberi inisiatif lain kepada pekerja kasar bagi rakyat Malaysia sahaja agar dapat menarik lebih ramai rakyat Malaysia menceburi bidang pekerjaan tersebut.

12. PR-1332-L69332
Tuan Zairil Khir Johari [Bukit Bendera] minta **MENTERI KESIHATAN** menyatakan sama ada Kementerian bercadang untuk mengetatkan peraturan-peraturan berkenaan premis makanan agar tindakan lebih keras dapat diambil terhadap pesalah berulang.
13. PR-1332-L67946
Tuan Haji Ahmad Nazlan bin Idris [Jerantut] minta **MENTERI PERTANIAN DAN INDUSTRI ASAS TANI** menyatakan apakah usaha Kerajaan-kerajaan Negeri dalam membantu Kementerian memastikan tanah untuk pertanian kekal dan boleh ditambah dalam memastikan makanan mencukupi.
14. PR-1332-L69060
Tuan Chong Chieng Jen [Bandar Kuching] minta **PERDANA MENTERI** menyatakan bilakah Kerajaan akan mematerialisasikan seruan kaum-kaum native (kecuali Melayu) di Sarawak supaya dirujuk sebagai satu kaum, ianya "Bangsa Dayak", termasuk pemindaan definasi "native" di Lembaga Persekutuan dan klasifikasi di segala borang Kerajaan.
15. PR-1332-L68907
Datuk Noor Ehsanuddin bin Mohd Harun Narrashid [Kota Tinggi] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah peranan Kementerian bagi menghadapi bencana seperti banjir terutama daripada segi peranan sebelum, semasa dan selepas sesuatu bencana berlaku.
16. PR-1332-L67958
Datuk Mohd Idris bin Jusi [Batu Pahat] minta **PERDANA MENTERI** menyatakan langkah-langkah konkrit memanfaatkan wang zakat sebagai penyelesaian masalah kemiskinan dan pengangguran, serta masalah sosial yang lain ekoran daripada masalah tersebut di kalangan rakyat.
17. PR-1332-L67832
Dato' Haji Mohd Zaim bin Abu Hasan [Parit] minta **PERDANA MENTERI** menyatakan apakah langkah dan tindakan Jabatan Kemajuan Islam Malaysia (JAKIM) untuk membanteras pengaruh ideologi dan dakwah Islamic States (IS) daripada terus berkembang di Malaysia.
18. PR-1332-L67871
Dr. Michael Jeyakumar Devaraj [Sungai Siput] minta **MENTERI TENAGA, TEKNOLOGI HIJAU DAN AIR** menyatakan langkah-langkah yang sedang diambil oleh Tenaga Nasional Berhad untuk menjana kuasa elektrik daripada kuasa solar, kuasa angin dan kuasa pasang-surut air laut.
19. PR-1332-L67803
Dato' Othman bin Aziz [Jerlun] minta **MENTERI PERTANIAN DAN INDUSTRI ASAS TANI** menyatakan keberkesanan skim bantuan yang telah diberikan kepada para nelayan dan sejauh manakah ianya berjaya meningkatkan taraf sosioekonomi golongan tersebut.

20. PR-1332-L68491
Tuan Gobind Singh Deo [Puchong] minta **MENTERI KERJA RAYA** menyatakan apakah rancangan Kerajaan untuk meningkatkan sistem jalan raya di kawasan Taman Equine Puchong dan bilakah tindakan ini akan dilaksanakan. Secara umum, sebutkan usaha-usaha untuk menyekat dan mengatasi masalah trafik di Kawasan Parlimen Puchong.
21. PR-1332-L68033
Tuan Anyi Ngau [Baram] minta **MENTERI BELIA DAN SUKAN** menyatakan sejauh manakah komitmen Kementerian melalui National Football Development Plan di dalam merekrut bakat terpencil dari kalangan pelajar sekolah di kawasan luar bandar dan pedalaman yang turut mempunyai minat serta kebolehan di dalam sukan bola sepak.
22. PR-1332-L67665
Dr. Azman bin Ismail [Kuala Kedah] minta **MENTERI PERTANIAN DAN INDUSTRI ASAS TANI** menyatakan sama ada benar berlaku perubahan ketara dalam kadar dan taburan hujan di Malaysia dan apakah implikasi perubahan ini terhadap sektor pertanian negara.
23. PR-1332-L67990
Dr. Noor Azmi bin Ghazali [Bagan Serai] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapakah jumlah keseluruhan aduan yang diterima berhubung dengan pelaksanaan GST pada awal April yang lalu. Dan daripada jumlah tersebut berapakah aduan yang belum atau sedang dan telah diproses untuk diambil tindakan selanjutnya.
24. PR-1332-L67681
Tuan M. Kulasegaran [Ipoh Barat] minta **PERDANA MENTERI** menyatakan :-
- (a) kriteria-kriteria yang harus dipenuhi dan telah ditetapkan dalam pelantikan kenaikan pangkat hakim-hakim di mahkamah; dan
 - (b) apakah sebab-sebab Hakim Dato Mohd. Hishamudin Mohd Yunus dari Mahkamah Rayuan tidak dinaikkan pangkat ke Mahkamah Persekutuan.
25. PR-1332-L68997
Tuan Haji Hasbi bin Haji Habibollah [Limbang] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan berapakah bilangan peniaga-peniaga yang sudah diambil tindakan dan didakwa di mahkamah di bawah Akta Kawalan Harga Dan Antipencatutan 2011 sejak GST dilaksanakan di Limbang.
26. PR-1332-L69204
Dr. Haji Izani bin Haji Husin [Pengkalan Chepa] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan :-
- (a) berapakah jumlah premis perniagaan di seluruh negara; dan

- (b) berapa peratuskah daripada jumlah premis tersebut yang telah diperiksa dalam operasi Ops Catut dalam tempoh ia dilancarkan sehingga kini.
27. PR-1332-L67816
Datuk Sapawi bin Ahmad Wasali [Sipitang] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan jumlah kes dilaporkan oleh pengguna mengenai penipuan peniaga semenjak GST diperkenalkan pada 1 April lepas dan berapa kes sudah dibawa ke mahkamah setakat ini.
28. PR-1332-L67603
Dato' Takiyuddin bin Hassan [Kota Bharu] minta **MENTERI PENDIDIKAN** menyatakan apakah langkah yang sedang dan akan diambil bagi menyemai nilai-nilai murni di kalangan pelajar seperti yang diterapkan melalui subjek Tata Rakyat suatu ketika dahulu.
29. PR-1332-L67567
Datuk Nur Jazlan bin Mohamed [Pulai] minta **MENTERI PERTANIAN DAN INDUSTRI ASAS TANI** menyatakan jumlah subsidi yang diterima Kementerian serta pecahan agihan subsidi berkenaan dan mekanisme yang digunakan bagi memastikan subsidi berkenaan sampai kepada penerimanya.
30. PR-1332-L68445
Dr. Hajah Siti Mariah binti Mahmud [Kota Raja] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada Kementerian bercadang untuk meminda undang-undang supaya memanjangkan jangka masa waranti pihak pemaju perumahan selepas penyerahan rumah kepada pemilik untuk menangani masalah/defek/kecacatan yang timbul selepas 3 tahun menduduki rumah mereka.
31. PR-1332-L68430
Puan Kasthuriraani a/p Patto [Batu Kawan] minta **MENTERI KEWANGAN** menyatakan sebab mengapa setakat ini masih belum ada perancangan untuk mengharamkan penjualan samu murah (cheap liquor) ini walaupun wujudnya pelbagai akta dan undang-undang namun kadar penyalahgunaannya di kalangan warganegara Malaysia terutama sekali di kalangan etnik India dan bukan warganegara masih begitu tinggi.
32. PR-1332-L68199
Tan Sri Datuk Seri Panglima Annuar bin Musa [Ketereh] minta **MENTERI BELIA DAN SUKAN** menyatakan apakah peranan Kementerian dalam memajukan Liga Bola Sepak Malaysia dan apakah tindakan Kementerian dalam usaha memperbaiki ranking FIFA Pasukan Bola Sepak Kebangsaan.
33. PR-1332-L68003
Tuan V. Sivakumar [Batu Gajah] minta **MENTERI PENDIDIKAN** menyatakan jumlah mahasiswa-mahasiswi dari kalangan kaum India di setiap Institut Pengajian Tinggi Awam (IPTA) mengikut kursus berbanding dengan jumlah keseluruhan di setiap bidang berkenaan.

34. PR-1332-L68092
Dato' Sri Azalina binti Dato' Othman Said [Pengerang] minta **MENTERI DALAM NEGERI** menyatakan apakah langkah Kerajaan untuk menangani masalah mendapat kerakyatan untuk anak-anak wanita Malaysia yang berkahwin dengan warga asing dan anak mereka dilahirkan di luar negara, memandangkan terdapat banyak kes di mana wanita tidak berupaya untuk berbuat demikian walaupun terdapat pindaan pentadbiran.
35. PR-1332-L67527
Datuk Koh Nai Kwong [Alor Gajah] minta **MENTERI PERUSAHAAN PERLADANGAN DAN KOMODITI** menyatakan berapakah bilangan Kad Autoriti Transaksi Getah (KAT-G) yang dikeluarkan untuk pekebun kecil setakat ini. Adakah sistem ini mendapat galakan pekebun kecil getah.
36. PR-1332-L68666
Datuk William @ Nyallau anak Badak [Lubok Antu] minta **MENTERI DALAM NEGERI** menyatakan apakah langkah diambil oleh Kementerian untuk atasi permasalahan kemasukan dadah ke negeri Sarawak yang dilihat semakin membimbangkan dan boleh mendatangkan pelbagai masalah sosial serta menjadi punca kepada kegiatan jenayah.
37. PR-1332-L68621
Dato' Kamarul Baharin bin Abbas [Telok Kemang] minta **PERDANA MENTERI** menyatakan sebab-sebab kekurangan sumber kewangan Kerajaan untuk membiayai projek pembukaan tanah peneroka baru dan penyediaan infrastruktur yang telah dihentikan sebagaimana terkandung dalam Memorandum Jemaah Menteri bertarikh 19 Julai 1989.
38. PR-1332-L68333
Datuk Jumat bin Idris [Sepanggar] minta **MENTERI KESIHATAN** menyatakan adakah Kementerian masih menghadapi masalah kekurangan doktor pakar khususnya di kawasan pedalaman Sabah.
39. PR-1332-L68808
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan jumlah kos yang dibiayai oleh Khazanah Nasional dan Kerajaan Malaysia untuk penerbitan filem TV, "*Marco Polo*"• di Iskandar Malaysia Studios (IMS). Apakah fi yang dikutip oleh IMS daripada penerbit filem.
40. PR-1332-L68561
Datuk Hajah Norah binti Abd Rahman [Tanjong Manis] minta **MENTERI KESIHATAN** menyatakan apakah langkah yang telah diambil oleh Kementerian bagi mengatasi masalah kekurangan doktor di Sarawak.
41. PR-1332-L69269
Tuan Haji Khalid bin Abdul Samad [Shah Alam] minta **MENTERI DALAM NEGERI** menyatakan status kes siasatan berikut:-
- (a) Aminulrashid Amzah; dan
 - (b) Datuk Shaharuddin Ibrahim, Timbalan Pengarah Jabatan Kastam.

42. PR-1332-L69111
Tan Sri Dato' Seri Abd Khalid bin Ibrahim [Bandar Tun Razak] minta **PERDANA MENTERI** menyatakan senarai lengkap indikator sasaran lain dalam RMK-11 yang Malaysia perlu penuhi untuk mencapai status negara maju, berpendapatan tinggi menjelang 2020 memandangkan Pelan Tranformasi Ekonomi (ETP) terlalu fokus dengan kriteria berasaskan keluaran dan pendapatan.
43. PR-1332-L69389
Dato' Haji Mahfuz bin Omar [Pokok Sena] minta **MENTERI KEWANGAN** menyatakan kejatuhan nilai ringgit telah menyebabkan banyak barang keperluan import meningkat dengan mendadak. Kejatuhan ini di kala rakyat semakin dibebankan dengan kesan pelaksanaan GST telah menambah beban kewangan rakyat. Apakah langkah yang telah dilaksanakan oleh Bank Negara dan Kementerian Kewangan untuk mengatasi hal ini.
44. PR-1332-L68719
Tuan Lim Lip Eng [Segambut] minta **MENTERI PELANCONGAN DAN KEBUDAYAAN** menyatakan adakah benar bahawa tanah air kita tidak pernah dijajah, tetapi hanya dinaungi dan dilindungi oleh British.
45. PR-1332-L68234
Tuan Julian Tan Kok Ping [Stampin] minta **MENTERI KEWANGAN** menyatakan semenjak GST dilaksanakan, jumlah pendapatan daripada GST yang telah di kumpul sebelum potongan kos di negeri Sarawak.
46. PR-1332-L68978
Tuan Anuar bin Abd. Manap [Sekijang] minta **MENTERI BELIA DAN SUKAN** menyatakan sasaran pelaksanaan program Projek Angkat dan Upaya (PADU) yang bertujuan menangani masalah gejala sosial di kalangan belia.
47. PR-1332-L68394
Tuan Wong Ling Bui [Sarikei] minta **MENTERI KEWANGAN** menyatakan sama ada Kerajaan pusat masih memberikan BRIM pada tahun hadapan. Berapakah peratusan keluarga sedang menerima BRIM. Adakah peratusan itu meningkat atau menurun.
48. PR-1332-L68468
Tuan William Leong Jee Keen [Selayang] minta **MENTERI PENGANGKUTAN** menyatakan bilangan trafik udara melalui langit Malaysia setiap tahun dari tahun 2000 hingga 2014 dan status dasar "Asean Open Sky".
49. PR-1332-L68960
Dato' Mansor bin Othman [Nibong Tebal] minta **PERDANA MENTERI** menyatakan menjelaskan apakah ada usaha yang dilakukan oleh pihak Koridor Wilayah Utara menarik pelaburan sama ada luar dan dalam negara ke kawasan Parlimen Nibong Tebal dalam apa jua bidang ekonomi untuk mewujudkan peluang pekerjaan dan menjana pembangunan ekonomi setempat dan memaklumkan projek-projek yang sedang dan akan dilaksanakan.

50. PR-1332-L69093
Tuan Oscar Ling Chai Yew [Sibu] minta **MENTERI DALAM NEGERI** menyatakan mengapa Jabatan Imigresen gagal mengelakkan orang Suluk dan Bajau memasuki Sarawak secara haram. Berapakah anggaran orang Suluk dan Bajau yang berada di Sarawak secara haram dan berapa yang mendapat keizinan.
51. PR-1332-L69254
Dato' Kamarudin bin Jaffar [Tumpat] minta **PERDANA MENTERI** menyatakan adakah Kerajaan bercadang untuk menambah hari-hari sidang Parlimen dan mewujudkan jawatankuasa-jawatankuasa pilihan memandangkan kemudahan Ahli-ahli Parlimen sudah bertambah.
52. PR-1332-L69259
Dr. Mohd Hatta bin Md. Ramli [Kuala Krai] minta **MENTERI KESIHATAN** menyatakan tahap pembangunan hospital baru Kuala Krai dan bilakah ia dijangka siap sepenuhnya.
53. PR-1332-L67644
Datuk Haji Shabudin bin Yahaya [Tasek Gelugor] minta **MENTERI KEWANGAN** menyatakan jumlah peniaga-peniaga yang telah dikenakan kompaun atau saman akibat daripada kesalahan tertentu berkenaan GST dan apakah usaha dalam memastikan perkara yang sama tidak berulang.
54. PR-1332-L68487
Ir. Shaharuddin bin Ismail [Kangar] minta **MENTERI PENDIDIKAN** menyatakan sama ada pihak Kementerian mempunyai sasaran khusus berkenaan penempatan siswazah dalam pasaran pekerjaan tempatan selepas menamatkan pengajian dan apakah langkah proaktif yang telah dirancang bagi meningkatkan jumlah siswazah berstatus bekerja sebelum majlis konvokesyen mereka dilangsungkan.
55. PR-1332-L68246
Tuan Sim Chee Keong [Bukit Mertajam] minta **MENTERI PENDIDIKAN** menyatakan pecahan peruntukan pembangunan dan mengurus bagi setiap sekolah SRJKC, SRJKT, Sekolah Agama Rakyat dan Sekolah Mubaligh di Pulau Pinang dari 2004-2014.
56. PR-1332-L69224
Tuan Ramkarpal Singh a/l Karpal Singh [Bukit Gelugor] minta **MENTERI DALAM NEGERI** menyatakan nombor laporan polis berkenaan pembunuhan Kang Seak Siong oleh seorang anggota polis di sebuah pub di AUTOCITY, Pulau Pinang pada 14/10/2013 pada jam 2 pagi yang disiasat oleh Balai Polis IPD Bandar Perda dan perkembangan siasatan tersebut.
57. PR-1332-L67725
Dato' Haji Irmohizam bin Haji Ibrahim [Kuala Selangor] minta **MENTERI PERTANIAN DAN INDUSTRI ASAS TANI** menyatakan sejauh manakah perancangan Kementerian untuk mengalakkan pengusaha akuakultur untuk mendapatkan pensijilan Skim Amalan Pertanian Baik Malaysia (MyGAP) di mana pemilikan sijil ini akan membolehkan produk mereka dieksport ke ASEAN selaras dengan Komuniti Ekonomi ASEAN (AEC) tahun ini.

58. PR-1332-L67497
Puan Siti Zailah binti Mohd Yusoff [Rantau Panjang] minta **MENTERI PENDIDIKAN** menyatakan pencapaian program PT3 berbanding dengan sistem PBS dan cabaran utama yang dihadapi sepanjang perlaksanaannya.
59. PR-1332-L68681
Datuk Mas Ermieyati binti Samsudin [Masjid Tanah] minta **MENTERI PENDIDIKAN** menyatakan apakah langkah-langkah yang diambil apabila pelajar dikesan melalui ujian urin yang dijalankan di sekolah oleh pihak jabatan pelajaran atau pihak sekolah bagi membendung penagihan dadah berterusan dalam kalangan pelajar.
60. PR-1332-L69143
Tuan Chua Tian Chang @ Tian Chua [Batu] minta **MENTERI PENGANGKUTAN** menyatakan kemajuan dalam penyiasatan kemalangan Eurocopter AS3655N2 9M-1GB. Apakah pendedahan kotak hitam dan mengapa tidak ada transkrip rakaman yang disiarkan.
61. PR-1332-L68217
Dato' Hasbullah bin Osman [Gerik] minta **MENTERI KOMUNIKASI DAN MULTIMEDIA** menyatakan sejauh manakah pemantauan dan tindakan pihak Kementerian bagi memastikan perkhidmatan ASTRO yang terbaik sesuai dengan kadar bayaran yang tinggi mengikut pakej di mana gangguan cuaca seperti hujan dan angin yang menyebabkan kehilangan gambar menjadi rungutan pelanggan di seluruh negara.
62. PR-1332-L68924
Tuan Haji Ahmad Lai bin Bujang [Sibuti] minta **MENTERI PERUSAHAAN PERLADANGAN DAN KOMODITI** menyatakan jumlah permohonan Skim Tanam Baru Kelapa Sawit (TBSPK) bagi Parlimen Sibuti dari tahun 2011 sehingga 2014 dan berapa jumlah permohonan yang telah diluluskan oleh MPOB sehingga kini kepada pekebun sawit di Parlimen Sibuti (merangkumi Lambir, Bekenu, Niah).
63. PR-1332-L68520
Raja Dato' Kamarul Bahrin Shah [Kuala Terengganu] minta **MENTERI KEWANGAN** menyatakan siapakah yang telah menanggung segala 'liability' kewangan Terengganu Investment Authority (TIA) apabila Kerajaan Persekutuan telah mengambil alih syarikat tersebut dan menubuhkan pula " 1MDB " dan berapakah jumlah kewangan yang terbabit.
64. PR-1332-L68731
Tuan Ignatius Dorell Leiking [Penampang] minta **MENTERI DALAM NEGERI** menyatakan mengapa buku bertajuk 'Kristianisasi dan Gejala Murtad' yang ditulis oleh Mohd Farhan bin Abdullah yang mengkritik agama Kristian masih dijual di kedai-kedai buku seluruh Persekutuan Malaysia sedangkan buku yang bertajuk 'The Golden Son of the Kadazan' satu buku yang memaparkan biografi secara ringkas mengenai mendiang Datuk Peter J. Mojuntin masih diharamkan dan dianggap sebagai menggugat keselamatan nasional sejak 1978.

65. PR-1332-L68309
Tuan Wong Sze Phin @ Jimmy [Kota Kinabalu] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan jangkaan 10 tahun dari sekarang, nyatakan keluasan dan peratusan tanah penggunaan awam (public space) seperti taman rekreasi, perpustakaan dan sebagainya di sekitar Bandaraya Kota Kinabalu.
66. PR-1332-L68764
Tuan Gooi Hsiao-Leung [Alor Setar] minta **MENTERI PENDIDIKAN** menyatakan sama ada RM1 juta untuk SRJK (C) Aik Min, RM1 juta untuk SRJK (C) Yuk Meng dan RM50, 000 untuk SRJK (C) Pek Hwa seperti dijanjikan oleh Menteri Pendidikan pada 30 Oktober 2013 telah pun diberikan kepada sekolah-sekolah tersebut, kiranya tidak, kenapa.
67. PR-1332-L69000
Dr. Ismail bin Daut [Merbok] minta **MENTERI PENDIDIKAN** menyatakan adakah Kementerian akan mengkaji syarat Kelayakan Profesional Kepengetuaan atau National Professional Qualifications Education Leadership (NPQEL) bagi lantikan Pengetua dan Guru Besar diberi kelonggaran kepada Penolong Kanan 1 yang telah layak untuk dilantik dahulu sebagai Pengetua Guru Besar kemudiannya akan mengikuti kursus tersebut. Semua calon yang layak perlu melalui tapisan terlebih dahulu.
68. PR-1332-L67633
Datuk Joseph Salang anak Gandum [Julau] minta **MENTERI DALAM NEGERI** menyatakan jumlah sebenar pekerja asing mengikut pecahan yang berdaftar dan yang tanpa izin serta jantina dan negara asal masing-masing.
69. PR-1332-L67584
Dato' Johari bin Abdul [Sungai Petani] minta **MENTERI WILAYAH PERSEKUTUAN** menyatakan adakah Kementerian sedar Kampong Baru Kuala Lumpur adalah umpama sebutir intan yang tidak digilap, malah tidak begitu menarik bila Kampong Baru wujud di tengah-tengah pembangunan yang amat rancak. Apakah perancangan Kementerian bagi membangunkan Kampong Baru. Bilakah ianya akan bermula.
70. PR-1332-L68576
Dato' Seri Reezal Merican bin Naina Merican [Kepala Batas] minta **MENTERI BELIA DAN SUKAN** menyatakan kejayaan Kementerian dalam memperkasa Institut Kemahiran Belia Negara (IKBN) untuk generasi muda Malaysia bersaing di era globalisasi ini.
71. PR-1332-L68939
Datuk Ikmal Hisham bin Abdul Aziz [Tanah Merah] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah langkah yang diambil oleh Kementerian bagi memastikan pengusaha hotel dan restoran mengenakan caj perkhidmatan dua kali ganda kepada pengguna.

72. PR-1332-L68078
Tuan Jeff Ooi Chuan Aun [Jelutong] minta **MENTERI DALAM NEGERI** menyatakan statistik terkini mengenai anasir-anasir pro ISIS di kalangan Pasukan Keselamatan Bersenjata dan orang awam Malaysia, serta orang asing yang telah dikesan, disiasat dan ditangkap setakat ini.
73. PR-1332-L68899
Datuk Aaron Ago anak Dagang [Kanowit] minta **MENTERI KEWANGAN** menyatakan masalah dan kejayaan dan penerimaan rakyat ke atas pelaksanaan GST yang mula dilaksanakan pada 1 April 2015.
74. PR-1332-L69364
Datuk Juslie bin Ajirol [Libaran] minta **MENTERI KOMUNIKASI DAN MULTIMEDIA** menyatakan strategi komunikasi termasuk penggunaan media sosial agar segala yang dirancang dan dilaksanakan oleh Kerajaan dapat difahami, dihayati dan dihargai oleh rakyat. Sebagai contoh, usaha murni Kerajaan untuk memperkukuh pendapatan negara melalui pelaksanaan setiap bajet negara dan Rancangan Malaysia untuk kepentingan rakyat.
75. PR-1332-L68857
Datuk Wira Haji Ahmad bin Hamzah [Jasin] minta **PERDANA MENTERI** menyatakan :-
- (a) pencapaian petunjuk prestasi utama (KPI) bagi golongan Bumiputera di semua Kementerian dan agensi Kerajaan; dan
 - (b) langkah memperkasakan agenda ekonomi Bumiputera dilaksanakan di semua Kementerian dan agensi bagi memastikan pembangunan negara bersifat inklusif.
76. PR-1332-L68672
Tuan Mohd Rafizi bin Ramli [Pandan] minta **MENTERI KEWANGAN** menyatakan setiap pembayaran faedah dan bayaran pokok bagi setiap hutang/bon 1MDB dalam tempoh bermula Januari 2015 hingga selesai semua hutang tersebut. Perincian mengikut bulan dibayar, jumlah bayaran dan kepada siapa.
77. PR-1332-L68952
Tuan R. Sivarasa [Subang] minta **MENTERI DALAM NEGERI** menyatakan alasan Kerajaan menolak permohonan Kerajaan Phillippines untuk "*xtradite Manuel Amalilo*"• ke negara itu untuk menghadapi pendakwaan penipuan yang serius yang juga melibatkan mangsa-mangsa daripada negara Malaysia.
78. PR-1332-L68638
Tuan Su Keong Siong [Ipoh Timor] minta **MENTERI PELANCONGAN DAN KEBUDAYAAN** menyatakan langkah-langkah yang diambil dan cara-cara bagaimana untuk mempromosi dan memelihara bangunan-bangunan warisan di sekitar Bandar Raya Ipoh.

79. PR-1332-L68102

Puan Hajah Zuraida binti Kamaruddin [Ampang] minta **MENTERI DALAM NEGERI** menyatakan apakah dengan menyiarkan berita-berita sensasi yang mengaibkan (lucah), seringkali yang menjadi contoh adalah akhbar Harian Metro, dapat mendidik masyarakat kepada arah yang lebih maju.

80. PR-1332-L67777

Datuk Seri Panglima Haji Abdul Ghapur bin Haji Salleh [Kalabakan] minta **MENTERI KEMAJUAN LUAR BANDAR DAN WILAYAH** menyatakan bilakah Kementerian akan melaksanakan pembinaan dan operasi Maktab Rendah Sains Mara di Kalabakan yang merupakan projek janji pilihan raya yang baru lalu.

81. PR-1332-L67698

Dr. Che Rosli bin Che Mat [Hulu Langat] minta **MENTERI PENDIDIKAN** menyatakan :-

- (a) apakah punca kemerosotan Purata Gred Nasional dalam keputusan SPM yang diumumkan dalam bulan Mac 2015 lepas dan langkah mengatasinya; dan
- (b) apakah Kementerian mempunyai unjuran keperluan tenaga manusia mengikut bidang yang ditetapkan untuk tempoh 5-10 tahun akan datang bagi memudahkan para lepasan SPM membuat pilihan di peringkat Pendidikan Tinggi.

82. PR-1332-L68541

Datuk Ahmad Jazlan bin Yaakub [Machang] minta **MENTERI PENDIDIKAN** menyatakan apakah bentuk kerjasama yang dicapai hasil daripada lawatan YAB Menteri Pendidikan ke Negara China pada penghujung tahun lepas di dalam usaha mengantarabangsakan Bahasa Melayu dan menjadikan Bahasa Mandarin sebagai bahasa ketiga di negara ini.

83. PR-1332-L67904

Tuan Loke Siew Fook [Seremban] minta **PERDANA MENTERI** menyatakan sama ada Kerajaan akan menubuhkan Jawatankuasa Khas Parlimen dan Suruhanjaya Pembaharuan Undang-undang untuk mengkaji setiap Rang Undang-undang sebelum dibentangkan dalam Dewan Rakyat seperti yang dicadangkan oleh Menteri Di Jabatan Perdana Menteri YB. Batang Sadong baru-baru ini.

84. PR-1332-L68317

Tuan Shamsul Iskandar bin Mohd Akin [Bukit Katil] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan secara terperinci pelan pelaksanaan tapak pelupusan sampah di Sungai Udang yang ketika ini mengancam 3000 penduduk sekitar dengan pencemaran bau.

85. PR-1332-L68270

Puan Teresa Kok Suh Sim [Seputeh] minta **MENTERI KEWANGAN** menyatakan sama ada Kerajaan akan meningkatkan ambang pengenaan GST pada syarikat daripada urus niaga RM500,000 setahun ke ambang yang lebih tinggi supaya tidak menjejaskan syarikat kecil. Berapakah syarikat yang layak melaksanakan GST yang masih mengeluarkan bil dengan tangan dan macam manakah Kerajaan membantu mereka.

86. PR-1332-L69218

Tuan Ahmad Baihaki bin Atiqullah [Kubang Kerian] minta **MENTERI KOMUNIKASI DAN MULTIMEDIA** menyatakan ramai pengguna yang melancong ke luar negara terutamanya, telah dicaj oleh syarikat-syarikat telco dengan jumlah puluhan ribu ringgit semasa menggunakan khidmat "roaming" daripada syarikat-syarikat tersebut tanpa menyedari peningkatan berganda-ganda caj yang dikenakan. Apakah tindakan yang telah dibuat oleh pihak Kementerian untuk mengatasi perkara ini dan mengelakkannya daripada berulang.

ATURAN URUSAN MESYUARAT DAN USUL-USUL

1. Perdana Menteri akan mencadangkan :-

Bahawa Dewan ini,

menyedari akan cabaran pertumbuhan ekonomi serta pencapaian sosioekonomi semasa pelaksanaan Rancangan Malaysia Kesepuluh;

merestui usaha Kerajaan untuk meneruskan Dasar Transformasi Nasional atau DTN dalam merangka dan merencana Rancangan Malaysia Ke 11 seterusnya;

meluluskan pelaksanaannya bertunjangkan falsafah Dasar Transformasi Nasional dalam ikhtiar menjadi sebuah negara maju pada tahun 2020, menurut Kertas Perintah 23 Tahun 2015; dan

Bahawa dalam meluluskan Rancangan Malaysia Ke-11, Dewan yang mulia ini menyeru agar semua pihak bersama-sama dan berusaha menjayakan matlamatnya.

2. (D.R. 18/2015) Rang Undang-undang Antipemerdagangan Orang dan Antipenyeludupan Migran (Pindaan) 2015- **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (20 Mei, 2015)**

[Menteri Dalam Negeri]

3. (D.R. 19/2015) Rang Undang-undang Kebajikan Haiwan 2015 **Bacaan Kali Yang Kedua**

[Menteri Pertanian dan Industri Asas Tani]

4. (D.R. 20/2015) Rang Undang-undang Institusi Kewangan Pembangunan (Pindaan) 2015 “

[Menteri Kewangan]

5. (D.R. 9/2015) Rang Undang-undang Kanun Tatacara Jenayah (Pindaan) 2015 “

[Menteri Dalam Negeri]

6. (D.R. 12/2015) Rang Undang-undang Keterangan “
(Pindaan) 2015

[Menteri di Jabatan Perdana Menteri]

7. (D.R. 24/2014) Rang Undang-undang Dadah Berbahaya “
(Pindaan) (No.2) 2014

[Menteri Kesihatan]

8. PR-1332-U67740
Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat rungutan-rungutan di kalangan rakyat Negeri Sabah dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak diendahkan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke Negeri Sabah dan ditambah buruk pula dengan pemberian status warganegara kepada mereka ini. Dan mengambil maklum juga bahawa, Para Pilihan raya Umum Ke-13, Kerajaan Malaysia telah menubuhkan Suruhanjaya Siasatan Diraja mengenai dengan pemberian Kewarganegaraan kepada pendatang asing tanpa izin di Negeri Sabah. Dan mengambil maklum juga bahawa, Laporan Suruhanjaya Siasatan Diraja ini telah pun dibentangkan ke Parlimen tetapi sehingga kini rakyat masih tertanya-tanya apakah tindakan yang telah diambil ke atas hasil siasatan suruhanjaya ini. Dalam hal ini, Kerajaan hendaklah memandang serius akan kesan dan implikasi ketidakpuasan hati rakyat negeri Sabah dalam hal ini. MAKA, bagi menangani masalah ini, Dewan ini hendaklah mengambil ketetapan bahawa, Kerajaan hendaklah segera mengambil tindakan tegas ke atas mereka yang didapati bersalah dalam isu ini serta mengambil tindakan yang wajar bagi memulihkan kepercayaan rakyat Negeri Sabah kepada kesungguhan Kerajaan Persekutuan untuk mempertahankan kedaulatan negara termasuklah mengeluarkan kad pengenalan baru bagi penduduk negeri Sabah yang tulen."

[Menteri Dalam Negeri]

9. PR-1332-U67741
Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kepadatan penduduk dan jumlah kenderaan yang keluar masuk ke kawasan Bandaraya Kota Kinabalu telah meningkat secara mendadak sekali. Dan mengambil maklum juga, kesesakan jalan raya ke Bandaraya Kota Kinabalu telah menjadi serius sehingga menjadi rungutan bukan sahaja penduduk setempat malah juga dari kalangan pelancong dalam dan luar negara.

Dan mengambil maklum juga bahawa, seperti bandar-bandar lain yang telah membangun, Bandaraya Kota Kinabalu juga memerlukan satu Sistem Pengangkutan Awam yang efisien, seperti Sistem Aliran Ringan atau Light Rail Transit (LRT) bagi mengatasi masalah di atas. Maka, bagi menangani masalah ini, Dewan yang mulia ini hendaklah mengambil ketetapan bahawa satu system aliran ringan atau light rail transit hendaklah dibina melalui kaedah private finance initiate bagi menghubungkan Bandaraya Kota Kinabalu dengan kawasan sekitarnya."

[Perdana Menteri]

10. PR-1332-U69065

Tuan Ng Wei Aik [Tanjong] akan mencadangkan:-

"Bahawa Dewan ini mengambil ketetapan bahawa segala siasatan dan pendakwaan di bawah Akta Hasutan 1948 terhadap wakil-wakil rakyat, termasuk juga pemimpin-pemimpin parti politik perlu diberhentikan atau digugurkan dengan serta-merta selaras dengan prinsip-prinsip demokrasi yang melindungi kebebasan berucap seseorang rakyat selagi ucapannya tidak menyentuh empat perkara iaitu Institusi Raja, Artikel 152 dan 153 Perlembagaan Persekutuan berkenaan dengan Bahasa Kebangsaan dan hak-hak istimewa Melayu dan hak-hak kerakyatan."

[Menteri Dalam Negeri]

11. PR-1332-U67694

Tuan M. Kulasegaran [Ipoh Barat] akan mencadangkan:-

"Bahawa Dewan ini mengambil maklum bahawa banjir telah melanda di beberapa negeri pada baru-baru ini, di mana harta benda rakyat telah dimusnahkan dan banyak nyawa telah terkorban. Dalam keadaan ini Dewan ini mengarah Perdana Menteri supaya mengambil strategi jangka masa panjang untuk mengatasi masalah ini dengan segera."

[Perdana Menteri]

12. PR-1332-U68783

Dr. Tan Seng Giaw [Kepong] akan mencadangkan:-

"Bahawa Dewan ini membahaskan faktor-faktor yang menyebabkan gerakan militan di Malaysia."

[Menteri Dalam Negeri]

13. PR-1332-U68787

Dr. Tan Seng Giaw [Kepong] akan mencadangkan:-

"Bahawa Dewan ini mendebatkan langkah-langkah untuk mengatasi pelbagai masalah disebabkan pelaksanaan GST."

[Menteri Kewangan]

14. PR-1332-U69257

Dato' Kamarudin bin Jaffar [Tumpat] akan mencadangkan:-

"Menyedari Bahawa masih terdapat lebih kurang 3,000 orang kakitangan kerajaan yang bergaji di bawah RM850.00 sebulan. Justeru itu Kerajaan diminta untuk menaikkan gaji kakitangan tersebut ke paras melebihi gaji minima negara."

[Perdana Menteri]

15. PR-1332-U69487

Dato' Kamarudin bin Jaffar [Tumpat] akan mencadangkan:-

"Memandangkan satu bencana banjir yang amat luar biasa telah berlaku pada bulan Disember 2014 di Kelantan yang mengakibatkan kerosakan harta benda yang besar dan memusnahkan sekitar 2000 buah rumah kediaman; Memandangkan bahawa bencana alam adalah tanggungjawab Kerajaan Pusat; dan Memandangkan bulan Ramadhan akan bermula pada 18 Jun 2015, maka Dewan ini mempertimbangkan dengan segera untuk memastikan Kerajaan Pusat dengan kerjasama Kerajaan Kelantan menyiapkan pembinaan rumah-rumah mangsa banjir ini disiapkan sebelum 18 Jun 2015."

[Perdana Menteri]

16. PR-1332-U67593

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum, terdapat ketidak cekapan Kementerian Pendidikan dalam mengurus asetnya di mana puluhan unit kuarters di Taman Semarak, Sg Petani ditinggal terbiar, tidak didiami dan telah menjadi sarang penagih dadah. Jika aset ini tidak diselamatkan ianya akan membawa kerugian kepada Kerajaan dan maruah Kementerian akan tercemar. Tindakan serta merta mesti diambil untuk menyelamatkan aset-aset ini."

[Menteri Pendidikan]

17. PR-1332-U67594

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum, kebolehan berbahasa Inggeris dikalangan pegawai-pegawai Kumpulan A, Perkhidmatan Awam Malaysia makin menurun. Pihak Kerajaan mestilah mengambil tindakan drastik bagi memperbaiki keadaan dengan memberikan kursus-kursus intensif kepada mereka. Kerajaan juga mesti memasti Pegawai-pegawai Kumpulan A melalui kursus wajib Bahasa Inggeris yang mesti di adakan di INTAN atau mana-mana institusi pengajian tinggi."

[Perdana Menteri]

18. PR-1332-U67595

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum, terdapat masalah yang dihadapi oleh pengguna kenderaan bagi mendapatkan lesen memandu bila mereka gagal dalam ujian berkomputer. Kerajaan harus mengkaji semula adakah syarat wajib lulus ujian berkomputer ini masih sesuai dan relevan memandangkan kos yang makin meningkat semasa mengambil ujian ini dan walau pun lulus ujian berkomputer kemalangan jalan raya masih tidak berkurangan."

[Menteri Pengangkutan]

19. PR-1332-U69440

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murah (cheap liquor) secara mudah dan murah yang semakin berleluasa. Gejala pengambilan arak murah ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan.

Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Kesejahteraan Bandar, Perumahan dan Kerajaan Tempatan]

20. PR-1332-U69441

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan".

[Menteri Dalam Negeri]

21. PR-1332-U69442

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Menteri Pendidikan]

RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2015</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
CMD. 23	Rancangan Malaysia Kesebelas 2016 - 2020 Eleventh Malaysia Plan 2016 - 2020	21 Mei 2015